

輟

耨

迷

輟輟述卷之三

閩夢宜耘叟陳全之粹仲甫輯

京都形勢說

本朝之都燕也蓋與古不同稍難于周

漢而大勝于東漢趙宋矣夫周漢建都西北地資建
瓴之險人藉風氣之勁天下莫之競焉東漢宅雒已
失全勢宋人捐燕雲則又無限胡之防故卒不能為
守我 朝都燕雖風氣之厚士馬之強不及周漢然
據險防胡居外馭內其視周漢一也故自其常論之
則京後為最急宣大次之遼東次之陝西又次之去
京有遠近也夫京師為最急則大寧之內徙三衛之

盤據不可不講也。宣大次之則獨石之孤懸豐勝之
淪沒不可不講也。講大寧則宣薊無阻隔而遼東之
右臂伸。講豐勝則山陝有交應而甘肅之左臂伸。此
立國之宏規保安之上畫也。而永樂宣德之間但知
兀良哈之成款開平之艱遠豐勝之丁口不立甘心
棄土略不顧惜得非往事之恨乎。自其變論之則大
寧不可復而京後之重垣宜設。宣遼不可合而花當
朵顏之交構宜防。開平東勝已淪異域而宣大之士
馬不可一日忘戰而成化弘治之間但知火篩之通
貢山海之征商宣大之鑿塹築敵臺京後之防一不

措之籌策。又非往事之恨乎。夫始也藉開創之威。東
斥大寧。西關豐勝。無難也。繼也藉生養之富。大垣京
後。盛兵宣大。無難也。時日因循。不以為意。偷玩既久。
釁孽乃生。虜犯太原。則增忻代澤潞之兵。而乘寧雁
之塞。虜犯洪蔚。席昌。則城宣府之塞。而弛東北之防。
夫阻太原之寇。在力戰于大同偏頭之間。恤洪蔚之
擾。當不忘乎潮河川黃花鎮之備。增忻代澤潞之兵。
則度支急。弛東北之防。則畿輔震。近年之經營。得微
亦有過乎。嗟夫。白刃在前。不顧流矢。虜既目宣大矣。
垣宣大可也。明哲所燭。防患未然。因垣宣大而併垣

京後亦可也。積薪必燃，防川必決，以宣大為餌而先垣京後亦可也。悉力宣大，置京後不講，則所謂輕重緩急之間失權多矣。於戲往有恨無能追也。近有過亦幸無大失也。今宣大之垣役告成而隆永之荼毒極慘慄矣。大城京後以奠金湯，宣大以戰而為守，京後以守而為戰，宣大遇秋則乘塞餘時，有入與之戰，京後有警則乘塞餘時分為番休，以習禁軍之勞逸，斯皆所謂即體酌用，備形勢之道也。

按廢東勝則大同寧夏不為援，廢大寧則遼東宣府不為援，以榆林援大同寧夏，則偏頭關花馬池等處

所以孤弱以彘頰三衛代大寧則喜峰古北口黃花
鎮等處所以單薄近來益貢之傲雖小而急意者三
衛不可不設圖以處吉囊俺荅之患雖緩而重意者
河套不可不俟時而復

北畿防禦之勢山西行都司當其衝萬全都司護其
背大寧都司藏其備薊州守備斷其徑萬全都司一
衛一所嵌山西行都司之境瞭遠之道也大寧都司
五衛一所嵌薊州守備之境夾持之法也

周揚州七閩地疏云叔熊居濮如蠻從子分為七種
故謂之七閩宋分八郡故謂之八閩

入閩有三道建寧為險道兩浙之所窺也邵武為隘道江右之所趨也廣漳航海為間道奇兵之所乘也八閩所守必在邵陽邵陽所守必以杉關為門戶諺曰千金之家三遭婚娶而空百金之家十遭宴賓而亡可謂不遜矣此豈特閩俗哉

貴州偏橋清浪銅鼓五開四衛及黎平中潮龍里新化亮寨新化屯五所俱隸湖廣上游也雲南霑益所隸貴州開行道也四川黃平所隸貴州厚夷防也河南汝寧所隸鳳陽守中都也河南礪州所隸山西重壺關也山西廣昌所隸萬全嚴款荆也山西平定所

隸後軍謹外應也浙江嘉興所隸蘇州運海防也潼關衛隸中軍柔親戍也山西蒲州所隸潼關衛援關戍也

白虎通曰列土為疆非為諸侯張官設府非為卿大夫皆為民也尊德行仁說近來遠封域之限乎哉

政府 洪武三十一年六月命兵部尚書齊泰太常寺卿黃子澄預參國政 按洪武中懲胡惟庸之專權生亂遂罷丞相而分任六卿立定祖訓嚴為禁革俾永不得設丞相貽謀垂慮至深遠也內閣置大學士以備顧問官僅五品不預政柄而遷轉屬於吏部各

相鈐制其防尤密自三楊入閣乃以少師尚書兼大學士官尊於六卿而口銜天憲自是無丞相之名而有丞相之實矣故中外皆稱之曰宰相云

按絲綸簿之復歸內閣世宗英力妙算所以嚴政

本然不有大學士張璉孰遵承之故內閣票過奉旨事件開載揭帖類進與六科旨意題本逐日對同亦自璉始人臣操口代之重張不惟承革宿弊且能有所自處曰正德末錢寧家搜出題奏本四十餘件江彬家搜出阻抑邊情本一百三十六件司禮監隱情不報本數百件壅閉之患左右者之不明避豈自福

之道

成祖即位之初閣中有文淵閣印印文玉箸篆惟封
上詔草題奏揭帖用之不得下諸司下諸司以翰林
印凡入內閣者不得與機務也雖編脩贊善等官有
入內閣者亦得預機務矣文淵閣在禁中徐有貞署
銜自稱掌文淵閣事謬也

景泰元年二月侍講劉定之抗疏言人主當總攬乾
綱親決政務凡政事早朝未及決者宜日御便殿近
臣侍于側大臣奏于前言官察其邪正而加糾彈史
官書其言動以示懲勸君臣之間詢謀可否以求至

當此前代故事祖宗成法也遵而行之則剖決萬幾
日益以熟審察百官日益以明聖政益新天命益隆
矣若乃仍如前日無事但以奏本進入擬旨批出臣
恐偏聽生奸獨任成亂治化無由成也疏入不省

王鏊擬罪言曰班固死天下不復有史矣古之所謂
史官皆世守之人主所在執筆以從隨其言動皆親
見而直書之所謂信史也後世史官雖具員而無定
職人主動靜迥不相及政事不及與聞惟易世之後
則集前後奏疏而分曹書之以宰臣為總裁奏疏之
語果皆實乎分曹之人宰臣之意果皆公且正乎且

生于數十年之後追書于數十年之前其是非曲直
皆茫然無聞或得之傳聞已非其實縱得其實而亦
莫能燭其情偽或奪於衆不得書或迫於勢不敢書
或局于才不能書故一時君臣謀議勲業汨沒不傳
而姦憐情態亦無以發其微以為世戒監領者又往
往以私好惡雜乎其間故曰不復有史矣

王謚文恪
姑蘇人

劉定之曰聖朝承平既久釁孽潛滋內而姦臣播弄
外而驕虜憑陵故已巳中秋之變亘古所無然尚賴
天心默佑皇圖鞏固振威以遏其侮厚德以順其化
故庚午中秋之變亦亘古所無幹旋乾坤撥亂反正

何其神速也哉雖然聖神相繼于億萬年撫念前事

豈不留心於制治保邦之良圖也

劉謚文安
永新人

王鏊曰 英廟北狩蒙塵虜人悔禍旋奉駕歸此自古之所無也固國家國勢之強亦人事有以中其機會是時郕王監國不欲急君邊人謝之曰中國有主矣虜人抱空質而負不義於天下所以汲汲來歸蓋合鄭公孫申之謀也魯成公時晉人執鄭伯公孫申曰我出師以圍許為將改立君者晉必歸君故鄭人圍許示晉不急君也晉欒武子曰鄭人立君我執一人焉何益不如伐鄭而歸其君以求成於是諸侯伐

鄭鄭伯歸

按建文時節義之士相踵視死如歸至正統景泰間五十年也土木之難未聞皎然死節如所謂南朝李侍郎者豈亦建文末年摧抑太過而士氣不無少挫邪噫此士氣之所以當培植也

王鏊曰國朝三楊後得君最久無如李賢者亦能展布才猷然在當時亦以賄聞夫為相而以賄聞此固攘竊之流也比來益接踵矣雖小有才猷皆矯偽以自文安足論哉

陳文誌李賢墓謂量宏而福厚夫福誠厚矣遭遇實

隆矣但忌岳正張寧王徽王淵終身棄寘而奪情戀
位不能釋憾於羅倫則未見其量之宏也

正統四年六月京師大水詔求直言翰林編修劉定
之上言十事一言號令之出宜求其大公至正久而
無弊信賞必罰不為苟且二言公卿侍從宜時常召
見俾承清問因以觀其才能察其心術而進退之三
言降胡近處京畿宜漸分其類移置南地四言宜以
京官出任郡縣使民得蒙循良之政五言宜倣唐制
朝官陞官之時舉賢良自代六言武臣子孫宜習韜
畧七言守令之官宜詳加察八言安富恤貧九言丁

憂宜令終制十言宜遏僧尼疏留中不下

霍韜曰考之漢朝凡為賢相俱由郡守考之宋制凡為宰相須歷州郡蓋取其知閭閻之困苦與人情之練達也我朝薛瑄入閣則由御史李賢入閣則由主事皆為一時名臣今大學士楊一清亦由巡撫而轉吏部已選入閣矣是誠立賢無方善能變通者也

成化四年春正月改湖廣臨武知縣章懋為南京大理左評事湘潭知縣黃仲昭為右評事桂陽判官莊景為南京行人司副時羅倫由福建泉州提舉司提舉復南翰林脩撰稱為翰林四諫

正統元年正月吏部考功郎中李茂弘致仕時中官王振用事茂弘常言可憂者君臣之情不通今經筵進講不過應故事以粉飾太平而睽隔蒙蔽未必無意外之虞也遂抗章致仕去

按成周之制以冢宰統閹寺西漢之制以丞相監宮中宋人循周漢之遺亦以宦官制屬於宰相樞密故內侍任守忠有罪韓魏公得以檄召而議貶近習梁彥俊言利僕射葉顥得以逮至政事堂而叱責之他可知矣三代而下制置閹宦之法莫良於宋故終宋之世宦官鮮專政亂國之禍視漢唐大不侔矣

凌翰曰國家閹宦寔與公孤之權相盛衰

天子早朝晏退日御便殿則天下之權在公孤一或宴安是懷相臣不得覩其面則天下之權在閹宦蓋公孤虛侍君側累日積月朝鍾不鳴華疏之八司禮監文書房則主之可否時出於內批公孤不得而與矣故三楊在宣宗時言無不售至英宗初則拱手唯命莫如之何蓋

宣宗則日臨羣臣躬攬庶政故與公孤親而權在公孤英宗初政頗事燕閑故與閹宦親而權在閹宦一人之身前後所遭如此國家政權所寄之由也是

故王振汪直劉瑾之徒得私盜國柄以威弄於肘腋
今

天子龍飛英睿神武日親機務延接公卿闥宦之徒
雖有巧佞無所于售且稍有踰越輒鞭笞以死是故
喙息竄伏唯任使令昔也公孤出闥宦之門今也闥
宦出公孤之門又何勞

聖天子復講制之之權乎雖然事固貴于謹始勢又
難於克終懷老成忠愛之心者固不敢即以為快也
丘濬曰 祖宗以勤為治無日不朝每日有早午晚
三朝或再朝焉誠以自古禍亂之端皆起自蒙蔽蒙

殺之由起自上下之情不通上下之情不通起自君臣不相接見然徒接見而不相親問猶不見也 聖祖御製大誥首篇以君臣同游為開卷第一義所以示萬世聖子神孫至矣深矣

兵部觀政進士常熟楊集以書上于謙畧曰姦人黃玠進易儲之說以迎合上意本脫死之計耳公等國家柱石乃戀官僚之貴而不思所以善後乎脫章綸鍾同死杖下而公坐享崇高禁清議何謙以書示王文文曰書生不知朝廷法度然有膽氣當進一級處之遂出集為六安州知州進士選知州始此

四百

永樂元年十二月工部尚書黃福奏陝西行都

司所屬屯田多缺耕牛具合准北京例官市牛給之
耕種之具於陝西布政司所屬鑄造悉從之按嘗因
黃福之言而有慨於西北諸處積荒之地不但可以
屯種雜糧雖江南之秔稻亦可植也山東通濟沁泗
沂諸水河南鑿汝蔡洹息諸渠陝西會涇渭漆沮諸
流則西北之田皆秔稻矣奈何經畫疆理既無西門
豹鄭國之徒而築舍道旁之言又紛紛也於是軍國
之賦盡仰給於東南矣東南民力烏得而不竭哉
劉定之曰有屯田之名無屯田之實耕種之際鹵莽

減裂收貯之後侵欺移用又曰以管屯為職者率優
游於城市何嘗有阡陌之巡以典屯而來者亦憑信
於簿書何能校倉庫之實則斯弊也至今猶未息也
鹽法國初召商中鹽量納糧料實邊不煩轉運而食
自足謂之飛輓後因積納數多價值亦賤興利之臣
遂改議上納折色行之既久習以為常彼時改折糧
料有餘而價亦賤計以所入為有贏利未為不可近
來糧料不足價亦騰貴徒煩轉糴邊用索矣大率塩
一引納銀伍錢先時可糴米一石今多不過三四斗
或二三斗故商人所納數倍於前而國初之所資以

餉軍者實則無增於舊彼此虧費其弊益滋是故多得銀不如少得米省和糴之擾也杜侵剋之弊也慰待哺之望也漸墾邊地以致殷富也一舉而四善具焉又謂間曾開納本色召商不至蓋向者上納本色時商自募民耕種塞下而得穀為易又塞下之積甚多而價輕又無戎虜之患今則耕種廢矣塞下之積虛矣穀價騰踴強虜出沒勢不安居商人安得糧料應召募乎欲復本色非減頭斗利商人使商人趨利而開墾邊地不可也然必遲之四五年而後得其大利弘治五年八月令兩淮等鹽運司鹽引俱於運司

召商開中納銀類解戶部太倉以備邊儲國初以來天下鹽課俱於各邊開中上納本色米豆商人欲求鹽利於近邊轉運本色以待開中故邊方粟豆無甚貴之時至是戶部尚書葉淇淮安人鹽商皆其親識因與淇言商人赴邊納糧價少而有遠涉之虞在運司納銀價多而得易辦之利淇然之內閣徐溥淇同年最厚淇遂奏准商人引鹽悉輸銀戶部送太倉銀庫收貯分送各邊鹽銀積至一百萬餘兩人以爲利而不知其壞舊法也商人赴邊開中之法旣廢近邊米豆無人買運價遂騰踴邊儲自此資於內帑而國

匱民貧日難整理矣

邊務學士商輅上言邊務訪得口外田地極廣因先
前在京功臣等官將口外附近各城土膏腴田地占
作莊田其諸空閑田地又被鎮守總兵叅將并都指
揮等官占為己業軍士無近便田地可耕夫且耕且
守如漢趙充國諸葛亮晉羊祜皆有已行之明效今
日守邊之要莫善於此若舍屯種之外而欲邊城充
實雖傾府庫之財竭生民之力奈軍士數多歲月久
遠亦難繼矣事下該司議行

王鏊曰國家邊費最大欲省轉運之費莫若興屯田

兵法取敵一鍾當吾二十鍾屯田一石可當轉輸二十石趙充國留田湟中內有已費之利外有守禦之備卒坐困西羌唐韓重華營田之利東起振武西逾雲州極於中受降城歲省錢千三百萬緡此前事之明效也今三邊之地固在也而人以為不可行者何哉鑒之此論誠當今之急務也

先是永樂間韃虜來降者多安置於東昌河間等處生養蕃息驕悍不馴方也先入寇之際皆將乘機騷動至是發兵征湖貴及廣東西諸處寇盜少保于謙奏遣其有名號者厚與賞犒隨軍征進平遂奏留彼

處於是數十年積患一旦潛消于肅愍之功為大潛
消默奪豈污下之見所能語耶

虜酋阿羅出渡河入套寇延綏河套周廻三面阻黃
河土肥饒可耕桑切近陝西榆林堡東至山西偏頭
關西至宣夏鎮東西幾二千里南至邊牆北至黃河
遠者八九百里近者二三百里即周之朔方秦之所
取匈奴河南地漢之定襄郡赫連勃勃趙元昊之所
據以為國者也唐三受降城在河套北黃河之外元
東勝州在受降城之東國初虜遁河外居漠北延綏
無事正統以後浸失其險虜始渡河犯邊鎮守都督

王禎始築榆林城創緣邊一帶營堡墩臺累增至二十四所歲調延安綏德慶陽三衛官軍分戍而河南陝西客兵助之列營積糧以遏寇路景泰初虜犯延慶不敢深入天順初阿羅出掠我邊人以為嚮導因知河套所在不時出沒遂為邊境剝膚之害矣

延綏紀功兵部郎中楊琬奏延綏慶陽二境東接偏頭關西至宣夏花馬池相去二千餘里營堡迂踈兵備稀少以致河套達賊屢為邊患近有百戶朱長年七十餘自幼熟游河套親與臣言套內地廣田腴亦有鹽池海子葭州等民多出墩外種食正統間有宣

夏副總兵黃鑑奏欲偏頭關東勝關黃河西岸地名
一顆樹起至榆溝速迷都六鎮沙河海子山火石腦
兒鹽石海子回回基紅鹽池百眼井甜水井黃沙溝
至寧夏黑山嘴馬營等處共立十三城堡七十三墩
臺東西七百餘里實與偏頭關寧夏相接惟隔一黃
河耳當時議者以為地土平漫難據已之後總兵官
石亨又奏欲將延綏一路營堡移從直道是雖不免
暫勞一時軍民之力實為萬世防邊之長策也上
曰楊琚所奏移堡防邊具有證據其言有理兵部即
會官議處以聞

按嘗歷延綏慶陽二境徃復於偏頭關花馬池二千里間凡諸營堡咸為稽考詢之將官故老猶皆記憶楊琚之策且曰曾銑幾於復套其計蓋不出此惜乎垂成而殺身也

召大同總兵楊信還京李賢等奏胡虜之衆不過中國一大郡連年被其侵擾徃徃得利而去且河套與延綏接境原非胡虜巢穴今虜酋毛里孩者居處其中出沒不常古云不一勞者不永逸今欲安邊必須大舉而後可乞令兵部會官轉議進兵搜勦務在盡絕其總制將官與凡出兵事宜俱預請處畫又秋禾

正熟虜騎必入掠而延綏鄜慶環縣一帶宜選武將
一人統步騎精兵萬人守禦計處庶幾有備無患於
是兵書王復及同孫繼宗等集議以為大舉搜套必
主將得人今鎮守大同總兵楊信舊鎮延綏稔知地
利宜召還京面受成筭其陝西延綏寧夏甘涼大同
宣府鎮巡諸官亦宜勅令整飭兵備候至期調發又
信既召還可以脩武伯沈煜代之上允所擬遂召
信還

成化二年六月勅陝西巡撫項忠太監裴當總兵楊
信協謀征勦河套

成化間程萬重之言不行嘉靖間曾銑之計不竟自
是無復敢為復套之議矣捐千里可耕之地貽各邊
多事之虞惜哉

建文元年正月冊 皇子文奎為皇太子
先是 皇者既謚懿文諱又曰允炆皇子生又名文
奎識者曰此臣下儒生之常稱爾不類天子氣象改
建文年號燕王訝之曰胡乃重複至是使臣民遍知
年與諱同無乃不祥乎小子且見其敗也

初焚惑守心四川岳池教諭程濟通術數上書言壯
方兵起期在明年朝議以濟妄言召入將殺之濟叩

頭曰陛下幸國臣至期無兵殺臣未晚也乃囚濟於獄建文元年七月赦程濟出獄擢為翰林編修充軍師護諸將北行

壬午宮中火起上變服剪髮自御溝出至郊壇遁去先是淮上諸將敗上召程濟還京至是從上潛行每遇險濟以術脫去相從數十年後隨至京莫知所終

建文四年壬午葬建文君初宮中火起時皇后馬氏赴火死及上入宮詰問宮人內侍以建文君所在皆指認后屍為建文君召翰林侍講王景問塋禮景

曰當葬以天子之禮從之

按弘治中禮部主事楊循吉嘗奏請追謚建文君以
景皇帝及元順帝為比謂順帝知天命歸我太祖
遂遜位而去其沒也得謚為順帝况建文又非勝國
可擬者以親親言之固當視景皇以避位言之尤
當視順帝追謚之典豈容已哉伏覩天順初英廟
憫建庶人無辜釋其囚而聽其婚娶出入萬曆建元
詔復死事諸臣祀于其鄉則加建文謚號比諸景帝
行當恭覩盛典矣

楊守陳常言古人謂國可滅史不可滅太祖定天

下即命儒臣撰元史 太宗靖內難史臣不紀建文君事遂使建文五年政事及當時忠於所事者皆湮沒不傳及今採擇尚可補國史之缺

景皇帝已復位號而 英宗實錄標目猶書郕戾王附是宜改正

西內老佛 正統五年十二月廣西思恩州獲異僧陞州為思恩府擢土官知州岑瑛為知府初岑瑛遇一老僧於道從者呵之不避詰其度牒驗之乃楊應能也遂自言曰此非吾姓名吾乃托此而逃者也汝獨不聞乎自金川失守大內火起吾遂潛由地道以出

自湖湘入蜀、至雲南、復至閩、最後入廣西、至橫州南
門壽佛寺居焉、居十五年、僧徒歸者日衆、吾復遁往
南寧、凍步江一寺、而歸者復如之、乃又去南寧、雲遊
四方、以度歲月、迤邐至此、淪落江湖垂四十年、老朽
待盡、早晚入土、無能為矣、行道傷嗟、君侯獨無憐憫
之心乎、願送骸骨、歸瑛大駭、聞于巡按御史、奏之、驛
送赴京、號為老佛、途次賦詩云、淪落江湖四十秋、蕭
蕭白髮已蒙頭、乾坤有恨家何在、江漢無情水自流、
長樂宮中雲氣散、朝元閣上雨聲愁、新蒲細柳年年
綠、野老吞聲哭未休、

又云正統七年出自滇南至廣西一日呼寺僧曰我
建文皇帝也寺僧大懼白官府迎至藩堂南面跣足
坐地自稱朱允炆曰胡濙名訪張邁邇實為我也衆
聞之悚然聞于朝乘傳之京師有司皆以王禮見比
至入居大內以壽終葬西山不封不樹鄞人黃潤玉
有學行為廣西提學親見建文君跌坐藩堂曰我朱
允炆也長身巨鼻聲如洪鍾大學士尹直亦得其事
於老內臣云

入京朝廷未審何人以尚膳太監吳亮建文時內使
也使之審視老佛見亮即曰汝非吳亮耶亮曰不是

曰我昔御便殿時棄片肉於地汝伏地飮食之何謂
不是聞楊士奇尚在能出一認乎亮佯為不知已而
復命遂取老佛入西內居之

又云建文君去蜀未幾入滇南常往來廣西貴州諸
寺中貴州金竺長官司羅永菴常題詩二首壁間其
一曰風塵一夕忽南侵天命潛移四海心鳳返丹山
紅日遠龍歸滄海碧雲深紫蔽有象星還拱玉漏無
聲水自沉遙想禁城今夜月六宮猶望翠華臨其二
曰閔罷楞嚴磬嬾敲笑看黃屋寄曇標南來瘴嶺千
層迥北望天門萬里遙款段久忘飛鳳輦袈裟新換

袞龍袍百官此日知何處惟有羣鳥早晚朝

鐵布政鉉色目人也為山東布政

文皇師至城下攻之百方設機隨變竟不能下

文皇擊其城城將破鉉書

太祖高皇帝牌懸城上師不敢擊後妣廣孝獻計曰
師老矣不如舍去

文皇入正大統擒鉉殺之其家屬發教坊為樂婦鉉
有二女數月終不受辱後問官至長女獻詩曰教坊
脂粉洗鉛華一片閑心對落花舊曲聽來猶有恨故
園歸去已無家雲鬟半挽臨粧鏡雨淚交流濕絳紗

今日相逢白司馬尊前重與訴琵琶其妹有詩曰骨肉傷殘產業荒一身何忍去歸娼淚垂玉筯辭官舍步蹴金蓮入教坊覽鏡自憐傾國色向人羞學倚門粧春來雨露寬如海嫁得劉郎勝阮郎問官復命文皇曰彼終不屈乎乃赦出之皆達士人

建文君嘗有詩云是日乘輿看晚晴葱葱佳氣滿金陵禮樂再興龍虎地衣冠重整鳳皇城人以為

文皇識也

靖難師至齊黃方練死焉有人賦詩云一箇忠成九族殃全身遠害亦天常夷齊死後君臣薄力為君王

固首陽

兵科給事中吳世忠疏乞推恩以表忠義謂昔

太宗皇帝奉天靖難當時文臣如方孝孺周是脩練
子寧鄒瑾魏公冕齊泰黃子澄諸人皆仗節以死夫
太宗之靖難者武王之心天下之大權也孝孺諸人
之仗節者夷齊之志天下之大慮也微大權則天下
之民命不立微大慮則天下之大義不明二者不可
廢一也世之說者徒以諸臣之迹為疑而不敢言此
皆不知 祖宗之心帝王之孝者 太宗嘗謂羣臣
曰人君立賢無方練子寧若在朕固常用之 仁宗

即位之初即詔齊泰方孝孺等俱是忠臣其子孫親戚抄沒充軍者悉皆赦回此二聖之所已行者也且仁宗既罪李時勉而日後又有忠文之謚真宗既誅于謙而未幾又有廟祀之舉祖宗雄畧率多類此陛下以祖宗之心為心褒表諸臣九廟神靈豈特生色而已耶事下禮部議格不行

余束髮時侍先大中大夫授革除遺事數葉殘編斷簡讀之未嘗不痛哭流涕也嗚呼臣之事君常變不齊順逆異遇惟求其是而已此天理常存人心不死宦轍南北見備遺錄晚又讀遜國記表忠錄得羣公

之事節亦麗詳矣又誦 聖帝神孫食祿盡心之言
不負所養之歎曰忠臣當從寬典曰田土悉宥給還
至於萬曆初登 詔命之頒 聖君賢相功貫天地
益見天理之所以常存人心之所以不死耒耜之暇
稍添數公為增補革除遺事錄附以東湖樵夫川中
錫匠三四逸傳見臣心之忠如水行地終不泯滅生
者死者惟求其是而已末綴以吳亮人人傳見君德
之大如日中天維鬼與神實護翼之嗚呼天理常存
人心不死彰明較著無存沒無古今耿耿不磨者也
廟號之復國史之補表祠之建寧不翹跂于後之君

子草野之夫維日望之全之識

宋太祖於太廟寢殿夾室鑄一碑謂之誓碑封閉甚嚴新天子即位禮啓默誦雖腹心大臣近臣皆不知靖康之變方得縱觀其詞三行一云柴氏子孫不得加刑市戮連坐支屬一云不得殺士大夫及上書言事人一云子孫有渝此誓者天必殛之其立國也如此陸渭南云濂溪之生也世但以佳士許之耳旣死蒲左轄作誌黃太史作詩其稱述不過如此向使無二程先生後世豈知濂溪為大儒傳聖人之道者耶以此知人之堙沒無聞者可勝計哉

宋元祐黨碑成於蔡氏父子其意則安石啓之也門
生子婿相繼得政果鑄寶鼎列元祐諸賢司馬光而
下姓名于其上以安石比禹稷而以司馬諸人為魑
魅自此黨論大興賢才消伏卒致戎馬南騖赤縣丘
墟一言喪邦安石之謂也及金兵入汴見鑄鼎之象
嘆曰宋之君臣用舍如此焉得久長遂怒而擊碎之
宋之南遷安石為罪之魁雖後漢晚唐禍不若是其
烈也而反得列於名臣何哉劉文靖公因書事詠安
石云當年一線魏匏穿直到橫流破國年草滿金陵
誰種下天津橋上聽啼鵲宋子虛詠安石亦云投老

歸耕白下田青苗猶未罷民錢半山春色多桃李無
奈花飛怨杜鵑二詩皆言宋祚之亡由於安石而含
蓄不露可謂詩史矣

宋世於郡縣立慈幼局凡貧家子多欲厭棄不育者
許其抱至局書生年月日局置乳媪鞠視他人家或
無子女却來局取養之歲侵子女多入慈幼局道無
拋棄者信乎仁澤之周也

古之史官凡人主所至執筆隨之如遷固載灌夫之
使酒霍光之廢立張湯之陽驚張禹之屢顧豈紀事
而已并其情偽得之此所謂信史也

史臣作傳遺其大者不特一人也宋范仲淹在天聖
慶曆間洛學未啓也公用兵於西而張載上書論兵
公一見知其遠器謂之曰儒者自有名教可樂何事
於兵遂以中庸一帙授之夫中庸傳道之書也而公
初揭示後學如此非見道分明者耶或以中庸為程
氏表章未之思矣然則仲淹之所以為宋朝人物第
一者豈徒以剛大之器經濟之畧先憂後樂之心哉
又稱公弱冠時大通六經之旨則公固斯文之豪傑
也愚考於梓溪文集云

齊地有蟲類蚯蚓大者人哨之曰巨白善擘地以行

呼之聲訛也孟子所謂吾必以仲子為巨擘者即蚯
蚓之大者也蓋前嘗謂蚓而後克其操註以為大指
非也

今之與楊墨辯者如追放豚既入其筌又從而招之
說者以為筌欄也非也香白芷之類異名豚之所甘
既放之得所又召之非善防邪說者也

狄仁傑一言而全人之社稷顏考叔一言而全人之
母子晏子一言而省刑

吳起說魏武侯罷兵服莊周說劍而衣短後之衣孟
子說齊王而言公劉好貨太王好色皆因其所好而

化之巽而入之善誘人也

范仲淹韓琦孰優荅曰以見則范也精以量則韓也
弘范慷慨近名韓渾厚近德

君不出環堵之外而知周天下好問之故也君運於
帷幄之中而德加方外親賢之謂也

預知王莽之奸而避之孔休一人而已不畏董卓之
威而拒之申屠蟠一人而已士之有識者可貴矣夫
諸葛孔明以巾幗遺司馬懿巾幗乃女子未笄之冠
燕京名雲髻蜀中名曇籠蓋天其堅壁不出如閨
女之藏匿也幗音憤古對切今音國非也

余常云唐世一藝之善如公孫大娘舞劍器曹剛彈琵琶朱嘉榮歌皆見於唐賢詩句中遂知名於後世當時山林隱逸不聞於世者亦多矣而賤工末藝得所附托垂於不朽亦有幸不幸也胡荅溪云齊魯大臣二人而史失其名黃四娘得托子美之詩以傳不朽亦可謂之奇遇也程子遇青城籬桶翁乃知未濟三陽失位為男窮之義又渡涪江乃遇達後如此舍後如此之樵夫誠哉世未嘗無賢而泯沒不聞者亦多也

人莫不愛其子孫愛而不知教之猶弗愛也人莫不

思其父祖思而不知奉其教猶弗思也陸放翁云
進賢舒梓溪大魁芬及第未幾即以言出爲福建提
舉吟詩云金榜題名墨未乾寸心耿耿向長安

九重殿閣金門鎖萬里江山赤子寒午夜人爭搖狗
尾一封誰肯犯 龍顏鳳皇臺上歸宜早不作育鰥
喑啞官

裴晉公不信術數每語人曰鷄猪魚蒜逢着則喫生
老病死時至則行

輟後述卷之三

輟耨述卷之四

閩夢宜耘叟陳全之粹仲甫輯

虜情說 國初以至于今虜勢強弱之不同其為中國害亦屢遷變易而不一矣知虜之所以為害而我之所以思患預防者不有道乎夫自妥懽既犇愛猷再竄成祖奮三駕之威台魯送軍門之款虜真脅肩屏息潛伏窮荒矣而東勝之守不嚴開平之勢難繼疆場出入胡騎數臨馬直興尤血刃屢見虜蓋窺強焉及夫英皇旋軫諸將協謀宣大之長城始繕脫脫之貢使數入虜亦貪漢財物希復內犯矣而大節

之部漸蕃火篩之詐屢售威遠肆侮姬信敗謀虞顛
失機張俊隕首則虜勢愈勃然焉近年以來虜我丁
口生養日滋登我叛人虛實益諳吉囊俺荅號稱梟
雄把都青台盡領部落每一入寇動稱十萬揚塵亘
震聲弦鳴雷視前為何如也故曰虜勢強弱之不同
然其初為寇也有乘驛馬持木兵者矣伺隙則進兵
出則走矣過堡砦戒備遇大鄉落疑畏不敢入矣而
繼也則振轡直前不避兵陣精騎約戰餘衆剽掠此
一變易也然尚未攻堡也邊人曰堡斯免矣又其繼
也則分道直前蔑視我衆殿數百以羈全營紛千萬

以震零堡此又一變易也其所破者百之一二耳邊
人曰堡稍嚴整斯免矣而今也則盛兵入塞自結長
圍方數十里莫測音耗鐵馬外馳輟軼營壘少兵內
集肉薄睥睨所過無不盡之鄉所攻無不破之堡則
又一變易也又其始掠騎畜得粟不知炊而食也繼
則入鄉必剽害得粟必囊往今乃入秋蹂禾舂米是
漸知粒食也又其始掠婦女遇男子多褫其衣縱之
繼則嬰穉必掠丁壯必戮今乃婦女老醜者亦戮丁
壯有藝能者亦掠是漸知集衆也又其始掠布帛繼
則取刃器取金今乃接戰奪甲得車焚輪是漸知貴

鐵也。又其始獲丁口重役之故，不堪役者多，謀歸正。繼則妻之妻，遺之畜，今乃拔盡力者，授之部曲，使將。是漸知用長也。又其始恃馬力，聞炮聲，奔見撓鎗，避。繼則以數騎誘我矢石，伺乏乃進，今乃肩門闔，抗木。牌突來，薄陣矣。是漸知避火器也。又其始以攻墩恐。激卒求緩烽，繼則有交餽，今乃易買櫛具。是漸知廣。奸細也。又其始未嘗用步兵，今則步騎雜至，未嘗用。我人戰，今則驅破堡之丁，攻不下之堡，或約言開門。皆大有變易也。而其重者則始也。志邊塞，庚子辛丑。志山西甲辰，志真保定，今則每每聲。京師諸關廂。

故曰虜之為害屢遷變易而不一也夫虜勢始弱而今強備之自宜有加為害變而不一則夫相機鼎應以為勝畧者固不可膠于故轍也夫過無不攻之堡矣而舊堡大不數雉高不數仞者莫之易攻無不破之堡矣而舊堡敵臺不加角臺不制者莫之舉虜知粒食矣將無食馬之耗而我馬顧日削虜知用長矣當有意外之防而邊人顧日困虜知貴鐵矣而我不求濟于短兵薄刃之外虜知集衆矣而我不求逞于離交間好之策虜知避火器矣而我火器愈不精虜知廣奸細矣而我奸細愈不詰以至虜用步而衆我

用騎而寡虜驅我攻我而逸我絕彼通貢而勞彼志山西真保四關廂以騷動我而我勒燕然擣賀蘭曾不一置諸口奚可哉故曰知虜之所以為害而我之思患預防者有道也抑又有說焉天下之事備于未兆者為力易已兆者為力難圖于始作者其禍淺已成者其禍深虜之所以屢遷變易而不一者大率中國人為之謀也大同之逋戮尚存思憶鄉貨掠口之恩給日廛絕念首丘是故石天爵之奉使求貢王三之糾虜犯邊利比西成榮同畫錦于是啗虜以肥甘衣虜以輕便而虜一一中之嗜慕愛悅以從其言而

逞其慾曰數舉則數舉曰深入則深入堡可攻則攻
堡陣可陷則陷陣於戲其亦幸而志虜掠也幸而思
鄉貨貴布帛子女也不幸而他有志焉則將如之何
哉備其未兆圖其始作是在體國者夫

正虜考叙

高皇帝永清四海傳檄驅胡魏鄂逐之於

前宋涼蹤之於後當是時然猶伏我障圍殘我吏民
掩我將校皇子元侯樹藩開府周匝三垂選練士馬
周防曲備羽檄南馳殆無虛日高皇垂訓時備西
北猷慮遠矣靖難之後臚胸挫跌五帥不還文皇
赫怒仗鉞四征雖嘗躁虜庭降名王俘其輜畜而我

之財力亦已大窘、至於末歲、猶議勤兵、廷臣力阻、
上意益堅、司徒匏繫於掖庭、本兵雉經於私第、榆林
之變、雖悔曷追、宣宗時出近郊、大蒐講武、喜峰之
役、薄伐山戎而已、正統十餘年間、貢使往來、好語相
休、謾和親於漢姬、委賜物於宋幣、我心狡焉、覬覦非
望、重以庵寺鴟張、柄臣首鼠、垣墉既潰、羈勒弗虔、卒
致六師失次、將相輿尸、輅馬被遮、四郊多壘、三陵徹
祀、萬雉幾搖、賴天之靈、景皇知人、善任文武大臣、
艱難宣力、禹迹遄歸、堯封如故、虜亦散亂、叛弒相尋、
我得寧輯、顧其書詞、桀驚使介、驕凌稍示、包荒治以

不治爾天順時我懷平城之警虜遣呼韓之隙雖有
寇掠亦能扞禦迨至成化諸酋競起分部爭雄各據
水州殘我邊郡河套沃土棄為虜巢威靈之捷足稱
敵愾顧茲讒口反謂貪功刀筆因而舞文干城為之
解體不惟大寧興和開平已非我有朔方河南亦非
職方之舊而河西遼東徼外城郭諸國保塞奚夷亦
漸携貳於是並塞萬里所在將屯官益多力益分財
益匱中國益困以故弘治初年頗搜往牒謂洪武永
樂皆嘗遣使穹廬至厓書勅錫之綺繡縻以官封苟
駕馭有方彼狎其餌吾峻其防亭堠不驚耕牧自便

遲以數年虜將耗鈍我益富強此計之得者也於時
許進行之大同三年三貢費纔十餘萬金大同東西
五鎮皆無虜患已而議者又謂虜入邊塞經關隘扣
關庭知我地利闕我兵力普化也先前車不遠我是
以閉關却貢專意內修己未庚申妖纏昂畢上谷雲
中慘被荼毒孝宗發憤召見公卿即議征討劉大
夏面陳利害僅遣柳棘之師坐收薇杜之績不然幾
蹈庚寅之故不貽己己之憂乎然當是時君臣輯睦
民物殷阜遭此外憂益勤內治海宇晏然不知兵革
比至正德河東陝西雁門以北歲有虜患隱敗冒功

上下欺蔽、修攘無策、人心思亂、盜賊四起、宗藩再變、豈惟衆叛、是謂親離、今皇帝躬神聖之資、來弔革之會、順治威嚴、化洽內外、蠢茲醜虜、曾何足慮、彼善憂者、以為近日諸虜、解讐結好、更入迭出、罷我奔命、且進退分合、頗有紀律、而又納我逋人、巧為間諜、混迹市廛、至窺京甸、往歲越大同、逾雁門、經太原、掠上黨、闖平陽、殘漁陽、困遼東、近復度紮荊、逼居庸、甚至入古北、犯都城矣、秦中隴西、去京已遠、即殺掠人畜、數萬、不以聞也、乃役役焉、議將、議兵、議食、議通貢、議戰、守、議賞、罰、亦直其細小者耳、嗟乎、三代之盛、漕輓

未及於江南、五季以還、門楣不施於薊北、漢開疆於
衛霍、唐感國於安史、豈若我朝山川綢繆、已得天
險、營鎮聯絡、更盡人謀、節其貢賦、有恒足之財、總其
紀綱、無專命之吏、蓋自生民以來、未有盛於今日者
也、善為國者、特加之意而已、或曰、周宣修行、獫狁于
襄、重華敷德、四夷來王、又曰、孰佐重華、皋夔益稷、孰
佐周宣、召張山吉、有以哉、有以哉、

花馬池

楊文襄公一清疏言、陝西各邊延綏城堡據

險、寧夏甘肅河山阻隔、賊雖侵犯、為患猶淺、惟花馬
池至靈州一帶、地里寬漫、城堡稀疎、兵力單弱、一或

失守、虜衆拆牆而入、犯我環慶、寇我固原、深入我平
鳳臨鞏、其間漢土雜處、倘兵連禍結、內變或因之而
作、根本動搖、誠非細故、此所謂膏肓之疾、腹心之患
也、成化初年、北虜在套、彼時未有邊牆、恣肆出入已
而得巡撫寧夏都御史徐廷璋修邊牆二百餘里、開
濬溝塹一道、延綏地方邊牆壕塹、又得巡撫都御史
余子俊修濬完固、北虜知不能犯、不復入套者二十
餘年、世平人玩邊備稍疎、牆既日薄、溝又日淺、弘治
十四年、大虜由花馬池拆牆而入、戕破內郡、虜人得
志、始蔑我邊牆為不足畏、連年擁衆拆入我軍、動輒

失利寧夏鎮巡屢奏乞築牆濬塹提督軍務都御史
史琳又乞於花馬池韋州設立營衛兵部奏下總制
尚書秦紘紘止添修四五小堡及於靖虜至環慶地
方挑挖邊塹一道七百餘里自謂可無虜患弘治十
七十八年冬虜復大舉仍自花馬池清水營折牆深
入紘所修邊塹營堡不能捍禦阻遏攻陷清水營殘
破花馬池上厓宸慮勅臣經理臣閻劣歷官陝西
有年虜情邊事頗嘗究心但腹裏頻年旱荒倉廩空
虛饋餉不繼虜賊動號數萬倏聚忽散未至而廣徵
士馬則徒費芻糧既至而調兵應援則緩不及事縱

使大兵既集務速則彼或不來持久則我師先老恐終無以伐其深入之謀沮其方張之勢嘗聞防邊之計莫危於戰莫安於守臣恐坐談不如親見自慶陽環縣延綏定邊寧夏花馬池興武清水營直抵靈州一帶邊牆城堡墩臺躬親閱視廣集衆思兼收羣策參酌損益始有定論其大要有四修濬牆塹以固邊防增設衛所以壯邊兵經理靈夏以安內附整飭韋州以遏外侵當務之急莫先於此但陝西財匱民勞修邊之役人多異議然利害有重輕關繫有大小大事可成則小費不足計遠效可圖則近怨不足恤此

至

臣區區犬馬一寸之忠也、今之河套、即周之朔方、漢之定襄、赫連勃勃統萬城也、唐張仁愿築三受降城、置烽堠千八百所、自是突厥不敢踰山牧馬、朔方無寇、歲省費億計、減鎮兵數萬、受降遠在河外、古之舉大事者、未嘗不一勞而後永佚、類如此、受降據三面之險、當千里之敵、正統以來、浸失其險、舍受降而衛東勝、已失一面之險、又輟東勝以就延綏、則以一面之地、遮千餘里之衝、遂使河套沃壤、為虜甌脫巢穴、其中深山大沙、勢顧在彼、而寧夏外險、反南備河、此陝西壯虜之患、所以相尋而莫之能解也、茲欲復守

東勝因河為固東接大同西接寧夏使河套方千里之地歸我耕牧開屯田數百萬用省內運不然則陝西用兵殆無虛日八郡之人疲於犇命民窮盜起禍將何極及今將延綏寧夏一帶邊防設法整飭賊米有以待之雖非上計猶愈於無策醜虜聞知或數十年未敢輕犯我得休養生息東勝之議未必終不可復也世之論邊事者或專主於戰伐臣亦非敢忘戰者方將蒐選官軍策勵將士修車馬備器械儲糗糧明斥堠今冬虜賊若復侵犯謹當督率諸將恭行天罰成功在天臣不敢必凡所當為臣不敢避今首以

築墻挑塹為言、宜必增茲多口、但受恩深重、自當為國遠圖、今年套內無賊、腹裏有秋、人民稍安、正可有為之日、應合經理邊防事宜、條奏伏望 聖明俯垂省覽

日本南倭 日本古倭奴國、海中諸夷倭奴最大、西南至海東北大山、國主世以王為姓、羣臣亦世官、地分五畿七道三島、又有附庸國百餘、拘邪韓最大、其國小者百里、大不過五百里、戶少者千多、止一二萬皆倭種也、漢滅朝鮮、通使稱王者三十餘國、倭王最雄長者居邪馬臺、即邪摩維、歷漢魏晉宋隋皆朝貢稍

習華音唐咸亨初惡倭名更號日本 國朝洪武二

年倭寇山東並海郡縣又寇淮安三年寇山東轉掠
浙東福建旁海諸郡是年遣萊州府同知趙秩賜璽
書諭其王良懷言倭寇海上書至日如臣我奉表來
庭不臣則修兵自固秩至諭王中國聖主威德責其
入貢王曰吾國未嘗不慕中國顧蒙古戎狄蒞華以
小國視我乃使趙良弼誅我好語初不知其覘我國
也旣而發舟數千襲我比至一時風霆漂覆幾無遺
類自是不與通者數十年爾得非良弼後乎將刃之
秩徐曰聖天子生華帝華非蒙古比我亦非良弼後

爾殺我禍不旋踵王氣沮禮秩具物遣僧隨秩奉表
稱臣入貢使未至又掠温州五年上諭劉基曰東夷
尚禪教姑遣明州天寧僧祖闡南京瓦官僧無逸開
諭之良懷欲留二僧力辭王遣使同二僧入貢是年
寇海鹽澈浦温州初令浙江福建造海舟防倭而倭
又寇福建海上諸郡六年以於顯為總兵官出海巡
倭倭寇登萊七年寇膠州是年遣僧來貢無表文却
之其臣亦遣僧貢馬茶刀扇上曰此私交也亦不受
令中書省移文責王九年遣僧歸廷用等奉表貢馬
及方物謝罪賜王及使文綺有差已而上覽表曰良

懷不誠詔責之十二年來貢無表文安置使人於陝
西番寺十三年遣使詔諭良懷遣僧如瑤貢馬令禮
部移書責王數掠我海上復却之諸僧皆安置川陝
番寺十四年遣僧入貢乞還安置諸僧使上曰日本
既謝罪還其使召至京宴賞遣歸十五年歸廷用又
來貢於是有林賢之獄曰故丞相胡惟庸通日本蓋
祖訓所謂日本雖朝實詐暗通奸臣胡惟庸謀為不
軌故絕之也是時惟庸死且三年矣十六年寇金鄉
平陽十七年如瑤又來貢坐通惟庸發雲南守禦是
年信國公湯和致仕居鳳陽上召至京諭曰日本小

夷屢擾東海上卿雖老強為朕行視要地築城防此
賊信國公築登萊至浙沿海五十九城民丁四調一
為戍兵二十年置浙東西防倭衛所是年遣江夏侯
周德興築福建海上十六城設衛所遂埽福建漳泉
人為兵戍並海衛所二十六年寇金鄉二十七年二
月遣都督僉事劉德商高巡視兩浙防倭三月又勅
都督楊文舉又勅魏國公徐輝祖安陸侯吳傑練浙
江海上兵防倭二十八年寇金州靖難後太監鄭和
等率舟師三萬下西洋日本遣人來貢并擒獻犯邊
賊二十餘人即付使人治之縛置甌中烝死永樂二

年使還遣通政趙居任賜王冠服文綺金銀古器書
画又給勘合百道令十年一貢每貢正副使等毋過
二百人若貢非期人船踰數夾帶刀鎗並以寇論居
任還不受王餽 上喜厚賜之尋命僉都御史俞士
吉賜王印誥冊封為日本國王詔名其國之鎮山曰
壽安鎮國山 上爲文勒石久之嗣王道義卒子源
道義嗣益奸狡時時令各島人掠我海上九年寇盤
石十五年寇松門金鄉平陽是年遣禮部員外郎呂
淵諭王還所掠海上人十六年遣使謝罪當是時數
入金蓋都督劉榮總兵守遼東繕海上墩堡伏兵伺

之十七年倭船入王家山島傳烽皆至榮率精兵疾馳入望海碣賊數千人分乘二十舟直抵馬雄島進圍望海碣榮發伏出戰遣奇兵布伏諸山下斷其歸路賊奔入櫻桃園榮合兵圍而攻之斬首七百四十二捕生八百五十七召榮至京封廣寧伯自是不敢窺遼東二十年寇象山初方國珍據溫台處張士誠據寧紹杭嘉蘇松通泰諸郡皆在海上方張既降滅諸賊強豪者悉航海糾島倭入寇以故洪武中倭數掠海上高皇既遣使命將築城增戍又命南雄侯趙庸招蛋戶島人漁丁賈豎蓋自淮浙至閩廣幾萬

人盡籍為兵分十千戶所於是海上惡少皆得衣食
於縣官洪武末年海中方張諸逋賊壯者老老者死
以故旁海郡縣稍得休息永樂初西洋之役雖伸威
海表而華人習知海夷金寶之饒夷人來貢亦知我
海道奸闖出入華夷相糾以故寇盜復起非廣寧之
捷禍未已也宣德元年遣人來貢人船刀劍不奉我
約束上諭使臣自後貢毋過三舟使人毋過三百
刀劍毋過三十否不受七年遣人來貢如約束受之
八年源道義卒命太監雷春少卿潘賜等弔祭十年
嗣王遣使貢謝倭自得我勘合方物戎器滿載而來

遇官兵矯云入貢貢即不如期守臣幸無事輒請俯
順夷情主客者為畫可條奏即復許貢云不為例嗣
後再至亦復如之我無備即肆出殺掠滿載而歸宣
德末年海防益備賊不得間貢稍如約遂許夷至京
師宴賞市易飽恣其欲已而備禦漸疎正統四年寇
大嵩入柁渚官庾民舍焚劫一空驅掠少壯發冢墓
束嬰孩竿柱上沃之沸湯視其啼號拍手笑樂捕得
孕婦忖度男女剝視中否為勝負飲酒荒淫穢惡至
有不可言者積骸如陵流血成川城野蕭條過者隕
涕於是朝廷下詔備倭命重帥守要地增城堡謹斥

堠修戰艦合兵分番屯駐海上寇盜稍息七年来貢
十一年寇海寧乍浦成化初忽至寧波知我有備矯
稱進貢守臣為請於朝且欲遣之至京楊文懿公守
陳貽書張主客力言其不可許二十年遣周瑋等來
貢弘治八年壽寧來貢正德六年宋素卿源永壽來
貢求祀孔子儀注不許鄞人宋澄告言素卿本澄從
子叛附夷人守臣以聞主客以素卿正使釋之令諭
王效順毋侵邊八年僧桂梧等來貢嘉靖元年王源
義植無道國人不服諸道爭貢大內藝興遣僧宗設
細川高遣僧瑞佐及素卿先後至寧波故事凡番貢

至者閱貨宴席並以先後為序時瑞佐後至素卿奸狡通市舶太監饋寶賄萬計太監令先閱瑞佐貨宴又令坐宗設上宗設席間與瑞佐忿爭相讐殺太監以素卿故陰助瑞佐授之兵器殺總督備倭都指揮劉錦大掠寧波旁海鄉鎮素卿坐叛論死宗設瑞佐皆釋還給事中夏言上言禍起於市舶禮部遂請罷市舶而不知所當罷者市舶太監非市舶也夷中百貨皆中國不可缺者夷必欲售中國必欲得之以故祖訓雖絕日本而三市舶司不廢市舶初設在太倉黃渡尋以近京師改設於福建浙江廣東七年罷未

幾復設蓋東夷有馬市西夷有茶市江南海夷有市
舶所以通華夷之情遷有無之貨收徵稅之利減戍
守之費又以禁海賈抑奸商使利權在上罷市舶而
利孔在下奸豪外交內訶海上無寧日矣番貨至輒
賒奸商久之奸商欺負多者萬金少不下千金展轉
不宥償乃投貴官家久之貴官家又欺負不宥償貪
戾甚於奸商番人迫近島遣人坐索久之竟不宥償
番人之食出沒海上為盜貴官家欲其亟去輒以危
言撼官府云番人據近島殺掠人奈何不出一兵備
倭當如是及官府出兵輒齎糧漏師好語啗番人利

此亂之所由起也

他日貨至且復賒我如是者久之番人大恨諸貴官家言我貨本倭王物爾價不我償我何以復倭王不掠爾金寶殺爾倭王必殺我盤據海洋不甯去近年寵賂公行上下相蒙官邪政亂小民迫於貪酷苦於徭賦困於饑寒相率入海從之凶徒逸囚罷吏黠僧及衣冠失職書生不得志羣不逞者皆為之奸細為之嚮導人情忿恨不可堪忍弱者圖飽煖旦夕強者奮臂欲洩其怒於是王五峰徐碧溪毛海峰之徒皆我中華微歛浙西之人金冠龍袍稱王海島攻城畧邑劫庫縱囚遇文武官發憤斫殺即伏地叩頭乞餘

生不聽而其妻子宗族田廬金穀公然富厚莫敢誰
何浙東大壞二十五年以朱統為浙江巡撫都御史
兼領興福漳泉治兵捕賊統清諒方勁任怨任勞嚴
戢閩浙諸貴官家嘗言去外夷之盜易去中國之盜
難去中國之盜易去中國衣冠之盜難上章鐫暴貴
官通番二三渠魁於是聲勢相倚者大譁切齒詆誣
惑亂視聽改統為巡視未幾言官論劾又遣言官即
訊甘心煅煉必欲殺統統憤悶卒統所任福建有功
海道副使柯喬都指揮盧鏜殺賊有功皆論死繫按
察司獄於是華夷羣盜唾手肆起益無忌憚三十一

年殘黃岩掠定海浙東騷動遣都御史王忬巡視兩浙兼領漳泉興福四郡以都指揮俞大猷湯克寬為浙閩叅將勦賊顧兵政久弛將士耗鈍水寨戰艦所在廢壞忬經畧未幾羣賊總至柵寨列港外約諸島內招亡命勢益猖獗三十二年大猷冒險出洋焚蕩巢穴首賊逸去羣倫流散乘風奔突倏忽千里溫台寧紹杭嘉蘇松楊淮十郡並受其害克寬統領步兵往來海壩護城捕賊斬獲亦多忬不肯隱敗冒功擒治奸豪破解支黨大猷克寬兩叅將皆知勇可任徒以江南人素柔軟賊未登岸望風奔潰文武大吏未

能以軍法繩下而有司往往以軍法脅持富人巧索橫斂指一科百師行城守餉犒百物類多乾沒十不給一廉謹之士又謂南人善謗低頭束手不敢動一錢於是公私坐困戰守無策始釋柯喬起盧鏜而賊船聯翩滿海破昌國臨山霏霽乍浦青村南匯吳淞江諸衛所圍海鹽太倉嘉定入上海掠華亭海寧平湖餘姚定海諸州縣焚劫殺戮污辱慘於正統時矣而通番奸豪又言忤大猷搗巢非計且搖動忤忤薦鏜起為閩參將代克寬克寬以副總兵將屯金山閩人故忌鏜劾鏜凶險不可用南京言官又復薦鏜三

十三年遂犯江北海門如臯通州皆被殺掠是時復用盧鏜為叅將而以俞大猷為浙直總兵未幾工部侍郎趙文華以海賊猖獗請禱海神遂遣文華行禱公私勞費不貲皆歸囊橐比忬改大同巡撫徐州兵備李天寵代忬南兵部尚書張經提督浙閩江南北軍務有王江涇之捷文華素忌經天寵遂奏經天寵逮詔獄論死西市而以浙江巡按胡宗憲代天寵南戶部侍郎楊宜代經自後賊益熾縱橫出入二十六郡文華還朝未幾又出監督諸軍搜括官庫富豪金寶書画數百萬計交通蒙蔽以敗為功以功為罪雖

有沈庄梁庄之戰竟莫救荼毒之慘兩浙江淮閩廣
所在徵兵集餉提編均徭加派稅糧截留漕粟扣除
京帑請給鹺課迫脇富民釋脫凶惡濫授官職浪費
無經其為軍旅之用纔十之一征發漢土官兵川湖
貴廣山東西河南北靡不受害臨賊驅之不前賊退
遣之不去散為盜賊行者居者咸受其害於是外寇
未寧而內憂益甚矣宗憲計擒賊首王直浙西江東
稍得安靖浙東溫台江址淮揚閩中頗表尤被其毒
已而俞大猷被中傷盧鏜代之賴朝廷聖明大猷
得不死江北巡撫李遂有廟灣之捷入南兵部為侍

郎唐順之代遂福建巡撫王詢數有功畏讒引疾去
代者劉燾宗憲以擒直功陞右都御史加太子太保
敘子錦衣千戶先是文華陞工部尚書以論吏部尚
書李默即加太子太保又以征倭功加少保子廕錦
衣千戶不數月文華削籍千戶謫戍榆林自壬子倭
奴入黃岩迄今十年閩浙江南北廣東人皆從倭奴
大抵賊中皆華人倭奴直十之一二久之奸頑者嗜
利貧窘者避徭賦徃徃喜賊至而貪殘之吏又從而
驅之封疆之臣輒請添官當事者不敢阻於是添設
都御史三人總兵一人副總兵二人叅將十三人兵

備副使十一人諸將校近百人田賦倍於常科徵徭
溢於甲式矣其俗男子魁頭斷髮黥面文身婦人被
髮屈紒皆跣足間用屨其喜盜輕生好殺天性然也
物產金銀琥珀水晶硫黃水銀銅錢白珠青玉蘇木
胡櫟細絹花布螺鈿漆器扇犀象刀劒鎧甲馬交市
華人喜得童男女錦綺絲綿磁針

國初吳淵穎論倭嘗說盡事情乃引辛毗對魏文帝
之言曰罷我互市任被貿易中國免徼利之名外夷
知効順之實計莫便於此惟其商道不通而利之所
在人必趨之不免巧生計較商轉而為寇商道既通

則寇復轉而為商彼其既犯 國禁思圖苟安因啗
引勢家同作勾當行之既久不免惹起奸圖大生覬
覷時則不因商道不通而實成寇心矣伏按 國初
禁海之例始因遣諭不來繼恨林賢巨燭之變欲與
閉絕之故非以通商之不便耳惟其不通商而止通
貢所以正德年間各道爭貢以規利市在彼國則強
請勘合倭王遂不能制在中國則有宗設宋素卿之
袖而漳寧惡少則甘蹈負固而肆橫行然以前狡偽
未備華夷兩家行之既久併力合作乃有不可支者
推厥所原各有行商之意而終貽地方之害能無處乎

晉郭璞遷福城記

桑田為海、人事更改、六旬甲子、當

見其害、更重着衣、周迴重載、鄭國歸朝、重關為待、鳥
出木空、千載不昧、前有雙眉、重施粉黛、溪澗水來、盡
歸于海、主揖其客、客住主在、穩首東日、高山鎮寨、本
自添金、因成右充、但見蛇影、莫知坐亥、事過方知、知
而未會、龍山高山、光照其代、巧婦能裁、得令人愛、若
解修心、得其終倍、市籠放火、聚集磊磊、有一老翁、手
把竹筒、重添新宰、在言不在、銘曰、太康之載、遷插甌
基、四色牢城、層巒三徑、洪許南流、瑞龍地應、其主螺
女、現對花峰、千載不雜、世代興隆、諸邦萬古、繁盛仁

風其城形狀如鸞似鳳勢氣盤拏遇兵不饑遇荒不

掠逢災不涿其甲子滿廢而復興太康三年

晉武帝年號元

年庚子二年辛丑三年壬寅太守嚴高圖越王山南之形勢以容

郭璞璞曰方山秀拔于前三山環峙于後八百年後

大盛又有識曰中間萃兀創危亭八百年前兆此名

天降元精如漢佐岳陶靈氣似周臣中坻不見容舫

路古渡應無病涉人好是褰裳待今日罍浦坊中人

挺生

按三山志嘗有人得石刻於城南釣龍臺其文如此也

從弟嚴之類集不肖男邦范梓行

萬曆癸未書
林熊少泉梓

輟耕述卷之四終

輟耕述

卷之四

七